

Alaaf zesamme, ihr Jecke us däm wunderschöne, bunte Stegerwald!

Hach, wat is dat herrlich, wenn ich he in die Runde luure.
Dat is wie de janze Welt op enem Quadratkilometer!
He sitze se alle zesamme:
us däm Irak, us Syrien, Marokko, us d'r Türkei un Kurdistan,
d'r Iran is do, de Ukraine,
un natürlisch uns ahle Bekannte us Polen, Belgien
un – ich jläuv et kaum – sujar us Hamburg sull es welche hehin verschlaare han!

Mer sin he internationaler als de UN-Vollversammlung,
nur dat mer uns besser verstonn un dat Kölsch he besser schmeckt!

De „Stroß d'r Spekulante“ un de enge Buden

Ävver mer müsse och ens Tacheles schwaade.
In unsre Buden weed et immer enger.
Mer rücken zesamme, bis de beim Nohber (Nachbarn) mit d'r Jabel im Teller sitz,
weil de Platz nit mieh reicht.
Un wat passiert direkt nevvean op däm ahle KHD-Jelände?

Do wolltense uns de „schöne neue Welt“ hinbaue.
Deuer Eigentumswohnungen für de Schickeria un Schickimicki-Büros.
Ävver wat is jetzt?
Stillstand!
Seid Johre passiert do nix außer dat et Unkraut hüher wächst als de Kräne.
„Stroß d'r Spekulante“ nenne mer dat hück.
Dat is moderne Ruinen-Romantik für Millionäre!
Die loote dat leever vergammle,
weil do mieh russpringt, als wenn se bezahlbare Wohnungen für uns baue.

Dat Drama met d'r Blechkist un de Knöllchen-Fee

Un wenn de dann ens hückzedage versöks, dinge Wagen irgendwo avzestelle –
janz ehrlich, da kannste direkt en Wallfahrt noh Kevelaer oder Mekka maache un
bette!

Parkplatzsöke in d'r Stegerwaldsiedlung is hückzedaach ne Extremsportart.

Un wehe, de stehls dich ens „kreativ“ an de Eck.
Dann kommen se direkt: de Knöllchen-Fee vom Ordnungssamp!
Zack, de nächste fuffzich Euro fott!
Die Begründung is ja immer: „De Rettungskräfte kumme nit durch.“
Ja, dat is ja eijentlich rischtisch, mer wolle ja nit, dat de Feuerwehr im Stau steht.
Ävver mer wolle och nit, dat de Stadt Köln uns als Melkkühe benutze deit!
Dat is wie de Wahl zwischen Pest un Cholera: Entweder de Pänz könne nit schlofe,
weil de Mam noch de zehnte Runde drierht,
oder de Haushaltskasse is leer, weil de Stadt Kölle wieder „Zahlemann-und-Söhne“
spielt.
Dat is dat, wat de Herr Burmester un singe Klüngel „Verkehrswende“ nennen –
Wahrscheinlich heiß et su, weil mer beim Blick op de Ticketpreise direkt umwende
will!
Hätt ihr dat jesinn? Dat Deutschlandticket is jetzt bei 63 Euro anjekumme!

Dat fing mal bei 9 an –
dat nennt mer wohl „inflationäres Reisen“.
Un de KVB zieht fleißig met: Einzelfahrt 3,90 Euro!
Wenn de met d'r janzen Familich ens noch'm Zoo fährs, kannst d'r Zoo direkt
koofe, dat is billijer!
Mer wenden entweder uns Bechkist su lang im Verkehr, bis mer kein Sprit mieh han,
un wenn mer statt desse Bahn fahre, simmer pleite, bevor mer an d'r Haltestelle sin!

Merz un dat Märchen vom süße Levve

Un dann kütt d'r Fritz Merz öm de Eck un verzällt uns jet vom „Lifestyle-Teilzeit“.
Ich jläuv, dä Mann war noch nie im Stegerwald.
Lifestyle? Wenn de als Pflejerin, op dem Bau oder im Lager schaffs un nit weiß, wie
de de Miete noch bezahle sullst, dann is dat kei „Lifestyle“,
Fritz, dat is Überlevvenskampf!

Wer in d'r Siedlung Teilzeit arbeit, dä mäht dat nit, um Champagner zu schlürfen,
sondern weil de Kita-Plätze fehlen!
Die Stadt spart sich kaputt, de Kitas maachen zo oder kürzen de Stunden –
un mer sullt dann Vollzeit schaffe? Wie dat dann?
Dä Merz soll sich ens – am besten mit singem Privatflieger – irjenswohin verkrümele
statt uns he ze erkläre, dat mr op Lifestyle mache!

De AfD un de Maske, die fällt

Un jetzt kommen mer zu dem Merzen's Fritz singen heimlichen Freunden -
de Blaue met d'r braune Jangart.
Angeblich muss de Merz ja die Politik machen, die die blaubraune Mischpoke vorhan,
weil die Lück das so wolle, sagt he.
Also, z.B. alle raus, die nit von he sin, damit dat „Stadtbild“ wigger stimpt.
Die Balubraune jedenfalls, die verzällen immer janz laut: „Mer maachen Politik für de
kleine Leute!“ – ja, is klar!

Leven Lück, opjapaass! :
Mer han dat jetz schwarz op weiß jesinn.
Do jing et öm de „**soziale Erhaltungssatzung**“ für uns Siedlung.
Dat Ding, wat et schwerer jemacht hätt, dat mer he einfach vör de Tür jesatz weede
künne,
Und wat hat die AfD jedonn? .

In d'r Vorabstimmung in d'r Bezirksvertretung woren die de **einziye** Fraktion, die jejen
uns gestimmt hät!
Die wollten, dat dat bisischen Schutz och noch fottkütt.
Die han d'r Weg frei jemaat für de Miethaie!
Wer jetz noch jläuv, dat die für d'r Arbeiter oder d'r klenge Mann sin, dä jläuv och, dat
dat Wasser im Rhing sauber is.
Die spalte uns de Nationalitäten, verzällen jet von „faulenze“, damit mer nit merke,
wie se uns hinger unserem Rücke de Existenz verkloppe!

De falsche Fründe un de Kampf in de Betriebe

„Un wisst ihr, wat noch viel fieser is?

Die braune Jeselle versuchen jetzt och noch, uns in de Betriebe de Solidarität kaputt ze maachen.

Do kummen se öm de Eck met su Pseudo-Gewerkschaften wie däm ‚Zentrum Automobil‘.

Ävver mer loote uns nit veräppele!

Dat is de Grundstein vom Faschismus: d'r Versuch, dat mer uns d'r Profitgier von de Bosse kampflos ungerordne.

Die Spaltung in Nationalitäten is doch nur dat Vehikel, dat Jift, dat se uns enjekippe, damit mer nit merke, woröm et wirklich jeiht.

De wahre Trennlinie, die läuft nit zwischen däm Hans un däm Ali, nur weil d'r eine jet anders kocht!

Die läuft zwischen uns, die he jeden Daach d'r Buckel krumm maachen, un denen da bovve, die uns am liebste noch de Luff zom Atme verkaufe würden.

Mer bruche keine ‚Interessenvertretung‘, die nur de Kop nickt.

Mer bruche Gewerkschaften als echte Kampforganisationen für uns Rächte!

Wer de Belegschaft hetzt, dä macht uns schwach, damit de Kasse bei d'r Kapitaliste noch lauter klingelt.

Ävver mir sage: Unsere Solidarität is unsre Macht!

Mer loote uns nit spalte, denn dat, wat uns verbingk, is uns Arbeit un uns Stolz – ejal, wo de Heimet is!“

Courage: Mieh als nur Fiire!

Ävver eines sage ich euch: „**Et kütt wie et kütt**“, dat jilt he nit!

Wir vom Frauenverband Courage han uns dat anders vörjestellt.

Mer künne nit nur „Heidewitzka“ singe un hoffen, dat de Welt von allein besser weed.

Mer wünsche uns en Welt, die frei is von Ausbeutung un Unterdrückung!

En Welt, wo et ejal is, woher de küsst, sondern dat mer solidarisch zuesammestonn.

Ävver dat fällt nit vum Himmel wie Kamelle beim Zoch!

Dozo muss mer sich **organisiere**, dozo muss mer sich anstrenge un och ens d'r Mund opmaache, wenn et unjerächt weed.

Fiire is joot für de Seele, ävver Organisiere is dat Fundament für de Zukunft!

Mer loote uns nit spalte, mer loote uns nit beklauen un mer loote uns nit veräppele – weder vom Merz, noch von d'r AfD un och nit von d'r Stadtspitze.

Mer rücken enjer zesamme – im Veedel un im Kampf für en jerechte Welt!

In däm Sinne:

Stegerwald Alaaf!

Internationalität Alaaf!

Solidarität Alaaf!